

«ԳԱԱ մաթեմատիկայի ինստիտուտում ստեղծվել է համագործակցության նոր հարթակ



ՀՀ ԳԱԱ մաթեմատիկայի ինստիտուտը համագործակցության է հրավիրում տարբեր ոլորտներում գործող ընկերությունների՝ առաջարկելով իր աջակցությունը մաթեմատիկական խնդիրների լուծման գործում:

Այս նպատակով ինստիտուտում ստեղծվել է համագործակցության հարթակ, որի շնորհանդեսը տեղի ունեցավ սույն թվականի ապրիլի 6-ին: Հարթակը ստեղծված է ինստիտուտի պաշտոնական կայքում:

Շնորհանդեսին մասնակցեցին ՀՀ ԳԱԱ նախագահ, ակադեմիկոս Աշոտ Սաղյանը, ՀՀ ԳԱԱ նախագահության անդամ, ակադեմիկոս Գեղամ Գևորգյանը, ՀՀ ԳԱԱ մաթեմատիկական և տեխնիկա-

կան գիտությունների բաժանմունքի ակադեմիկոս-քարտուղար Լենսեր Աղալովյանը, ԵՊՀ պրոռեկտոր Ռաֆայել Բարխուդարյանը, ՀՀ ԳԱԱ մաթեմատիկայի ինստիտուտի տնօրեն Ռաֆիկ Արամյանը, ինստիտուտի գիտաշխատողներ, «Ձեռնարկությունների ինկուբատոր հիմնադրամի» տնօրեն Բագրատ Ենգիբարյանը, տեղեկատվական տեխնոլոգիաների ոլորտում գործող ընկերությունների ներկայացուցիչներ:

ՀՀ ԳԱԱ նախագահ, ակադեմիկոս Աշոտ Սաղյանն իր ողջույնի խոսքում նշեց, որ ԳԱԱ-ում ստեղծվել է գիտական և գիտատեխնոլոգիական խոշորամասշտաբ ծրագրերի մշակման հարթակ, որի նպատակն է ձևավորել ստեղծագործա-

կան միջավայր՝ կիրառական նշանակություն ունեցող ծրագրեր գեներացնելու համար: «Մենք պետք է մասնավոր ընկերությունների հետ քննարկենք, թե ինչպես կարող ենք օգտակար լինել մեր պետությանը և տնտեսությանը: Մենք պետք է գիտությունն աստիճանաբար տանենք դեպի կիրառություն, արտադրողներին կապենք գիտնականների հետ: Եկեք համագործակցենք և օգնենք միմյանց իրագործել մեր նպատակներն ու զաղափարները», - ասաց Աշոտ Սաղյանը:

ՀՀ ԳԱԱ մաթեմատիկայի ինստիտուտի տնօրեն Ռաֆիկ Արամյանը նշեց. «Պետության զարգացման հիմնական գրավականը տնտեսության և գիտության համագործակցությունն է: Մեր երկրի համար դա այսօր առավել քան կարևոր է, և մենք ուզում ենք օգտակար լինել մեր պետությանը: Տեղեկատվական տեխնոլոգիաների ոլորտում ունենք կայացած ձեռնարկություններ: Բոլորն էլ ուզում են

ունենալ մրցունակ տեխնոլոգիաներ, որը ենթադրում է գիտական բաղադրիչ, և շատ հաճախ այդ բաղադրիչը մաթեմատիկական խնդիրներն են, մաթեմատիկական վերլուծությունները: Մենք պետք է ունենանք ուղիղ ճանապարհ դեպի տեղեկատվական տեխնոլոգիաների ոլորտ: Մեր միջև պետք է սկսվի երկխոսություն, ինչն էլ ակնկալում ենք այս հարթակի միջոցով: Մնալով հիմնարար հետազոտություններում՝ պետք է օգտակար լինենք կիրառականում: Մեր նպատակներից է նաև ստեղծել հնարավորություններ՝ երիտասարդներին դեպի գիտություն, ինստիտուտներ բերելու համար», - ասաց Ռաֆիկ Արամյանը:

Հանդիպման ժամանակ քննարկվեցին տարբեր առաջարկություններ համագործակցության ուղղությունների վերաբերյալ:

ՀՀ ԳԱԱ գիտության հանրայնացման և հասարակայնության հետ կապերի բաժին

